

DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS,

manè discutienda in Scholis Medicorum, die Veneris vigesima-sextâ
mensis Februarii, anno Domini M. DCC. LXXIII.

M. FRANCISCO BERNARD, Doctore Medico, Gallico
Idiomate Chirurgiæ Professore designato, Præside.

An magis amœna quam salubris in montium clivis habitatio?



UT pisces in aquis, sic immersus in aere vivit homo. Illi, quo puriore in undâ natant, quò liberius hæc unda renovatur, & fordibus, si quæ illam inquinaverint, quò faciliùs defæcat; eò in illâ magis delectantur, vigent saniores, melioremque induunt habitum, compagem & naturam. Imò si lutulenta, cruda, heterogeneis aqua scatet materiis; si mineralium salinis, sulphureis, aut vegetabilium & animalium putrescentibus sæta sit corpusculis; neque detur affluxuum & effluxuum libertas, pura impuris substituens; vel citò enecantur, vel languentes in pravam admodum naturam degenerant, macieque confecti lentæ sed præmaturæ morti occumbunt. Non aliter ab aeris conditionibus pendent hominum sanitas & vita. Frustrâ vegetis & robustis nati parentibus, maximè laudabili corporis constitutione gaudent: frustra sic aliis quinque rebus non naturalibus utuntur, ut indè illis & optima valetudo & in annos nestorios protracta longævitas promittantur: mille continuò is imminet ab aere pericula, quorum aliis dùm vitandis aut superandis invigilant solliciti, in alia incauti ruunt sæpè funestiora. His omnibus præcavendis sufficere nulli unquam arti, nulli prudentiæ datum est aut dabitur. Innumeris quippè modis aer in corpora vim suam exercet; innumeris proinde illa sive extrinsecus lædere, sive intus corrumpere potest. Lædit extrinsecus propriarum qualitatum vitio vel excessu, si nimirum sit æquò gravius aut levius, densior aut rarior, calidior aut frigidior, siccior aut humidior. Corruptit verò intus, dum varii generis exhalationibus inficitur, & cum heterogeneis miasmatis corporis interiora subit, seu inspiratus, seu per poros cutis inhalantes absorptus, seu imprimis deglutitus. Quot & quam diræ indolis morbi ab illâ interiori ex aere venenato corruptelâ exitiosam ducant originem, neminem medicum latet. Sic videre est in quantas aliquando strages è canosis paludibus, aut è martiis campis militum sanguine nuper truentatis, putrida effluvia per atmosphæram latè diffundantur, civium sanguinem huic mixti pessumdent; putridas, malignas, pestilentes, epidemicè accendant febres: vicos & urbes impleant terroribus, & funera ubique spargant. Similiter ex omnibus terræ plagis aerem inquinant lethiferæ exhalationes, & eò nobis infensor ille morborum fons, quòd insecti ut plurimum & securi, quòd moti, quiescentes, epulantes, dormientes, ex eo mortis se-



mina hauriamus. Nullibi autem ab aere sic impuro magis metuendum est, quàm ubi, infar aquæ stagnantis, nullo ventorum turbine agitur, aut illius undulationes & æstu reciprocos impediunt circum objecti obices. Nusquam imò salubrior aer, quàm ubi vent omnes ex oppositis liberè afflare possunt, suisque alternationibus, quidquid in ejus massâ heterogeneum est, verrunt & dissipant. Hinc hominum tanti interest quonam in loco habitent. Hinc abs re non videatur examini hic subijcere & inquirere an semper in eligendâ habitatione amœnitati sit fidendum; an v. g. in montium clivis habitatio, quàm amœna, tam salubris habenda sit.

I I.

IN clivis omnes rursus deliciæ captant oculos & mentem exhilarant. Primis illos radiis aurora salutat, jamque solis recreantur aspectu, noctis adhuc umbris valles contrastantibus. Illinc sibi gratulantes incolæ variis distinctum coloribus metiuntur horizontem, passimque nova mirantur. Nunc juvat, aut per patentem planitiem villas & pagos numerare, aut procul acrios montes, urbiumque turres, & naturæ opibus artis opes maritatas hinc & illinc prospicere. Nunc jucundè intentos detinent oculos, vel fugientis rivi fecundantes per prata circuitus, vel tranquillus amnis placidos volvens per littora obliqua fluctus. Seu, per agros viridantes naturâ renascente, flora variatis geminis arbores coronet; seu per arva latè flaventia messes auratas colono maturet Ceres, primis Pomonæ donis suas miscens divitias; seu per vineta Bacchum munera largientem canat alacris juvenus; vere, æstate, autumno, non alio quovis loco tam grata, tam amœna latè circumspicientibus spectacula panduntur. Inde tam multis arident clivi; inde tot urbani cives, dum soluti negotiis, strepitumque fugientes, placidam vitæ agrestis querunt solitudinem, æstivas in clivis sibi comparant domos. Liceat illis quidem tam laudati sitûs illecebras jacitare; sed fucum ne faciat blanda rerum facies. Sub floribus sæpè latet malè perfidus anguis, pluraque reverà sordent, quæ nitere videntur. Laudentur profectò clivorum amœnitates; sed in clivis diffidatur aeris salubritati. Nimirum ille non purus, ubi sunt & multæ causæ cur noxiis halitibus inficiatur, & impedimenta ne infectus abstergatur.

III.

UT cæteris in omnibus locis, sic etiam in montium clivis quidquid è terræ visceribus eructatur, quidquid vaporat ipsa globi, seu aquea, seu terrea superficies, mineralium emanationes, animalium & vegetabilium excretiones, ex iis combustis aut putrefactis fuligines, salia acria volatilia, fetida, putrida olea, in aerem sublimantur, immixtaque disperguntur; sic etiam aliquando visum fugientia insecta, vel earum corpuscula putrefacta, septica, per atmosphæram volitant, respirantibus infestissima; sed in aliis atmosphæræ tractibus sua perpetuò restituunt aeri mundities. Liberè illic ventis afflantibus continuo ipse renovatur, & quotquot in eo fluctuant miasmata & sordes, hinc & illinc disjecta fugantur. At in clivis tanto ventorum beneficio obstant ipsi suis caluminibus montes. Sic v. g. in clivo meridicem spectante, nec boreâ, nec austro aer sufflaminari abstergique potest. Non boreâ quidem: franguntur in montis tergum illius impetus: non ipso etiam austro: nimirum ipse incurrens halitus clivo impendentes in clivum magis impingit, & congerit, nondum disjiciat. A solis euro & favonio, cum sint clivo paralleli, sicque nullo obice præpediantur, illi halitus expurgari possunt. Quotquot venti medii sunt inter hos & illos, vel in montis tergum obliquè alliduntur, & tunc minimam fortèque nullam in aerem abstergendum vim exerunt, vel in ipsum clivum obliquè incurrunt, & tunc in aere contenta eò plus in clivum impellunt quo magis australes sunt. Manet ergò inquinatus aer, quandiù nec

ab oriente, nec ab occidente venti afflant. Patet inde quam sæpè longo temporis intervallo congestæ in eo sordes stagnare possint. Idem intelligendum, si ad septentrionem, orientem, occidentem, &c. clivus objiciatur.

Solâ igitur habitâ ratione exhalationum è clivis ipsis emissarum, ob minorem ventorum efficaciam, minus illic aer purus esse solet; sed ibi præterea dantur peculiæ majores inquinacionis causæ. Scilicet 1. ventis perpetuò athmosphæram, oceanis instar, in æstus reciprocos agitantibus, è mediis aerii illius maris tractibus, quidquid ibi sordidum & alienum innatare potest, in montium clivos tanquam in littora rejicitur & appellit; sicque fit aliquando ut aer ibi propter soli benignitatem paucos vel innocuos halitus continens, mephiti adventitiâ, sæpè è longinquis oris ope ventorum asportatâ, funestetur. 2. Nusquam frequentius occurrunt stagna, paludes, aut cloacæ, quam in vallibus propè imam clivorum partem, ob scilicet delapsas hinc aquas, seu pluviales, seu fontanas, seu puteales, post varios incolarum usus effusas; quarum duntaxat partem clivorum superficiei combibente & absorbente, altera pars infra defuit & volvitur, diversi generis sordes, terreas, salinas, oleosas, putrescentes fecum abripiens. Jam verò notum est quam sæpè lethalia è cloacis, paludibus ipsisque stagnis exhalent & circum seminentur. In clivis ergò aerem non solum proprii halitus, sed & alii tum è remotis plagis, tum è vicinis locis contaminare solent; & ne his mundari possit plerumque impediunt ipsi clivi ventorum libertati & alternationibus obstantes.

IV.

EX his sic intellectis minùs mirati sumus cur ferè non nisi in clivis morbos epidemicos observaremus, & cur v. g. in clivis, forè omnium in terrâ amænissimis, Luteriâ versùs septentrionem quatuor leucas distantibus, in ducatu scilicet Anguiensi, gallicè olim, nuncque etiam vulgò *la Vallée de Montmorency*, tam frequenter morbi epidemici grassentur. Nempè illic mons eminet, non mediocriter altus, ab oriente ad occidentem tres circiter leucas cum dimidiâ longus, unam verò à meridie ad septentrionem parte suâ superiore latus. Sylvis obregitur totum culmen; sed in vasto clivorum circuitu, præsertim versùs meridiem, latissima inter viucta, frequentes emicant & populosi pagi, passim elegantibus ædificiis & mirabilibus hortorum amphitheatris decorati. Ibi natura exultans omne amœnitatum genus oculis pandere amat, & horum incolis facillè quisque invidet; sed quantum sæpe distant jucunda à salubribus! E viginti circiter illis pagis rarò fit, ut non unus aut plures epidemiâ affligantur; & quod ante multi alii observaverant, singulo ferè decennio singulos hosce vicos semel aut pluries aliquo epidemico morbo laborare, id etiam nobis propriâ constitit experienciâ, dùm ab anno 1760 ad annum 1772 in hunc aut illum ferè continuò artis opem ferremus, ob accensam ibi & latè debacchatam febrem putridam inflammatoriam, petechiis & malignitate plerumque stipatam, sæpè in plures simul vicos, & sæpè in eisdem iteratis vicibus sævientem. Febrem illam non in regione tantùm Anguiensi, sed in aliis etiam grassantem vidimus. Ubique verò clivis, aut forè aliquando locis immediatè infra clivos sitis, addicta videbatur; neque ullis locis planis, undique apertis, epidemicè communicata est.

V.

SIC Physicæ principiis & observatione iunxi superest ut concludamus; at objicitur, 1^o. Sin montium clivis aer est montanus, nullus vero magis, quàm montanus, aer à Medicis commendatur. 2^o. In locis etiam planis & apertis campis morbi epidemici observantur. 3^o. His ultimis annis propter annonæ penuriam & pravitatem ab alimentis deducenda fuit epidemiarum causa, nec pendebat ab aere febris suprâ memorata. Vapores quidem ob-

jections! Nimirum 1^o. aer montanus de montium culminibus; non de clivis, intelligi debet & solet: non ergo hic à Medicis dissentimus. 2^o. Non hic contendimus morbos epidemicos in planis & apertis plagis nunquam observari. Illic quippe à variis esculentorum & potulentorum vitiis ortum ducere possunt; sed nobis sufficit, si vel nunquam vel rariùs ab aere ibi nascantur. 3^o. Quod annonæ inopiam & depravationem spectat, hinc morbos epidemicos aliquando oriri posse, hincque febrem ipsam suprâ dictam vires acquirere visam esse non hic disiteamur. Nempè dum lateret in aere morbi causa generalis, omnibus infidians; quos victus ratio parca nimis aut depravata debilitabat, in eos efficacius causa illa vim suam exerebat, naturaque impotens resistendo impar fiebat. Quibus autem mensa opima debitum in solidis robor, debitamque in humoribus energiam conservabat, in iis ut plurimum vis vitæ victrix malum repellebat. Indè in pauperes ferè solos sæviebat illa febris. At reverà primariam hujus causam non in alimentis, sed in aere latuisse variis demonstratur argumentis. Scilicet 1^o. ratione annonæ clivorum & planarum regionum par erat conditio, ratione febris grassantis dispar erat. 2^o. Quamvis sæpiùs pauperes, aliquando tamen divites optimis etiam cibus utentes febris illa invadebat. 3^o. In pluribus pagis epidemicè afflicti, cum diebus dominicis aut festis ad publicam precationem incolæ in templa frequentes convenirent, non semel observavimus epidemiam, quæ mitemere visa fuerat, his ipsis diebus exacerbari: nec sine admiratione deindè ab ægris plerisque audiebamus se die dominicâ, se in templo, aut è templo vix egressos, capitis dolore ingenti cum febre correptos fuisse. Undenam autem illi his diebus epidemix paroxysmi? nisi ex eo quod tunc illius causa ingravesceret; sed peior non erat alimentorum indoles. Patet verò aerem, ut in totâ pagorum atmospherâ, sic etiam in templis impurum, in his coercitum & stagnantem, fœdis adhuc incolarum illuc cocuntium halitibus inquinatum, majorem inde septicitaris gradum acquisivisse, sicque corporibus vim efficaciorè & funestiorè intulisse. 4^o. Animadvertimus etiam febrem illam epidemicam in illâ pagorum parte primùm solere accendidi, quam magis ipsi clivi, densæ arbores, aut alia obstacula ventorum efficaciam magis orbabant. Sic mense Januario anni 1767, in vici *Montmagni*, parte orientali, dictâ *les Fau-cilles*, è clivo pendente multisque arboribus impeditâ, jam multas per domos simul ægrotabant cum liberis & uxoribus miseri conjuges, tunc prorsus incolumi reliquâ parte non in clivo sitâ, quæ nonnisi mensibus sequentibus, communicatione, in calamitatis partem venit. Sic etiam mense martio 1769, vici *Montsoult*, in excelso clivo ad meridiem siti, cum pars occidentalis magis depressa, sylvâque adjacente & clivo ibi reflexo magis recta esset, illic primùm orta est & quasi inclusa mansit febris jam memorata; deinde mensibus Aprili & Maio, in cæteras omnes partes, nemini ferè parcens, grassata est, &c. Rectè igitur, ut à ratione, sic ab observatione concludimus.

Ergo magis amœna quam salubris in montium clivis habitatio.

Proponebat Parisiis THOMAS LE TENNEUR, Constantiensis, Doctor Medicus Cadomensis, nec-non Saluberrimæ Facultatis Medicinæ Parisiensis Baccalaureus, Theses Author, A.R. S.H. 1773. A SEXTA AD MERIDIEM.

Typis QUILLAV, Saluberrimæ Facultatis Typographi. 1773.